

Kalaallit Nunaanni suliffissarsiortut killilersimaarnissaat pillugu Namminersornerullutik Oqartussat Nalunaarutaat

Kalaallit Nunaanni suliffissarsiuussisarneq pillugu Inatsisartut peqqussutaanni nr. 11-mi 16. december 1988-imeersumi § 5, imm. 4 aamma § 8, imm. 3 aamma Kalaallit Nunaanni suliffissarsiortut killilersimaarnissaat pillugu Inatsisartut inatsisaanni nr. 27-mi 30. oktober 1992-imeersumi § 6 inun. 4 aamma § 8 naapertorlugu makku aalajangersarneqarput:

§ 1. Atorfik matuma ataani atorfiit taaneqartut iluanniittoq Kalaallit Nunaanneersumik imaluunniit immikkut Kalaallit Nunaannut attuumassutilimmik inuttalersinnaanngikkaanni sulisitsisoq pisussaavoq sulisussamik avataaneersumik atorfinitsitsinissamut imaluunniit sulisitsinissamut akuersissummik qinnuteqassalluni. Atorfinnut makkununga nunami umiarsuarnilu assartuutini atorfinitsitsinissanut akuersissut atorfinitsitsinnginnermi qinnutigineqarsimassaaq:

- 1) Atorfinnut suliamik ilinniagaqarsimanngitsunik inuttalernerqarsinnaasuni.
- 2) Atorfinnut suliasamat naapertuuttumik suliffutilimmi ilinniagaqqaarluni, inuutissarsiutinut tunngaviumik ilinniagaqqaarluni imaluunniit Siamasissumik Tunngaviumik Ilinniartitaaneq atorlugu ilinniagaqqaarluni atorfiniffigineqarsinnaasuni.
- 3) Atorfinnut annerusumik soorlu inunnik isumaginnittussatut aamma isumaginninnermi siunnersortitut ilinniagaqqaarluni atorfiniffigineqarsinnaasuni.
- 4) Atorfinnut imarsiornerup tungaatigut annertunerusumik ilinniagaqqaarluni atorfiniffigineqarsinnaasuni.

§ 2. Suliffissarsiuussisarfik aqqutigalugu konununbestyrelsimut sulisussamik avataaneersunik atorfinitsitsinissamut imaluunniit sulisitsinissamut akuerineqarnissamik qinnuteqaat immikkut immersugassiaq atorlugu sulisitsisumit qinnuteqaatigineqassaaq.

Imm. 2. Qinnuteqarfissatut immersugassami paasissutissat makku allanneqassapput:

- 1) Sulliviup aqqa, sumiiffia sulisitsisutullu normua.
- 2) Suliap sumut tunngasuunera.
- 3) Atorfiup qinnutigineqartup taaguutaa imaatalu allaaserineqarnera.
- 4) Pisinnaassutsimut piukkunnassutsimullu piumasarineqartut.
- 5) Atorfeqartitaanissap imaluunniit sulisinneqarnissap aamma sapaatip akunneranut sulisarnissap sivilissusissaat.
- 6) Atorfinnissami aningaasartuutissat, ineqarnissaq akissarsianullu tunngassuteqartut pillugit paasissutissat.
- 7) Atorfiup Kalaallit Nunaanneersumit pineqarnissaa pillugu iliuuserisimasani paasissutissat, tak. imm. 3.

8) Inuup atorfimmu atorfinitsinneqalersaartup, tamanna ilisimaneqalersimappat, aqqa.

9) Inuup atorfimmu atorfinitsinneqalersaartup Kalaallit Nunaannut attuumassutigisinnaasaa.

Imm. 3. Sulisartup Kalaallit Nunaanneersup qinnutaa sulisitsisup itigartissimaguniuk, tak. imm. 2 nr. 7, qinnuteqaat itigartitsinermit tunngaviliussamik imaqassaaq.

§ 3. Pisinnaassutsimut piukkunnassutsimullu piumasarineqartunik piumasai atorfiup imarpiaanun naapertuutissapput, suliasallu iluanni piumasarisasunik qaangiisoqassanani.

§ 4. Sulisumik avataaneersumik atorfinitsitsinissamut imaluunniit sulisitsinissamut qinnuteqaat suliffissarsiuussisarfiup tiguguniuk sulisartumik Kalaallit Nunaanneersumik atorfimmu piukkunnaateqartumik imaluunniit sulisussamik Kalaallit Nunaannut immikkut ittumik attuumassuteqartumik atorfimmu innersuussisoqarsinnaanersoq misissussavaa, tak. inatsimmi § 4. Innersuussineq suliffissamik innersuussisarneq pillugu malittarisassatut aalajangersakkat naapertorlugit pissaaq.

§ 5. Kommunalbestyrelsip sulisumik avataaneersumik atorfinitsitsinissamik imaluunniit sulisitsinissamik akuerineqarnissamik qinnuteqaat itigartitsissutigissavaa atorfik sulisartumut Kalaallit Nunaanneersumut piukkunnaateqartumut innersuussutigineqarsinnaappat. Tamatumunga peqatigitillugu suliffissarsiuussisarfiup sulisartoq pineqartoq sulisitsisumut innersuutissavaa.

Imm. 2. Kommunalbestyrelsi sulisussamik avataaneersumik atorfinitsitsinissamut sulisitsinissamulluunniit akuersissuteqassaaq, illoqarfimmi suliffissarsiuussisarfiimut imaluunniit Kalaallit Nunaanni suliffissarsiuussisarfinnit allanit sulisussamik Kalaallit Nunaanneersumik imaluunniit Kalaallit Nunaannut immikkut ittumik attuumassutilimmik piukkunnartumik pisinnaassusilimmik innersuussisoqarsinnaanngippat.

Imm. 3. Kommunalbestyrelsip akuersissut piffissamut killilerneqassasoq kissaatigippagu, tak. inatsimmi § 6 imm. 2, tamanna akuersissutikkut nalunaarutigineqassaaq.

Imm. 4. Itigartitsissut akuersissulluunniit immersuiffissiakkut immikkut tassunga atugassiaasukkut sapinngisamik piaarnerpaamik kingusinnerpaamillu qinnuteqaatip suliffissarsiuussisarfiimut tiguneqarneraniit ullut 14-it qaangiutinnginneranni nalunaarutigineqassaaq.

§ 6. Sulisussamik avataaneersumik ajoquseriataarnermut, ajutoornernut imaluunniit qinnuteqartup pisussatut naatsorsuutigereersinnaanngisaanut, aamma aaqqiigasuarnissamik iluarsaassigasuarnissamilluunniit pisariaqartitsilluinnarnermut atatillugu sulisussamik qinnuteqartoqarpat tamatumunga itigartitsissut akuersissulluunniit suliffissarsiuussisarfiup qinnuteqaammik tigusineraniit kingusinnerpaamik ullut marluk qaangiunneranni nalunaarutigineqassaaq.

Imm. 2. Qinnuteqartup nammineerluni qinnuteqaat nal. 12.00 nallertinnagu suliffissarsiuussisarfiimut tunniussimappagu itigartitsissut akuersissulluunniit aqaguani nal. 10.00 nallertinnagu nalunaarutigineqarsimassaaq.

§ 7. Qinnuteqaat § 6-imi iliuuserineqartartut malillugit suliarineqassasoq kissaatigigaanni tamanna qinnuteqartup allaganngorlugu qinnuteqaammini erseqqissumik nalunaarutigissavaa.

Imm. 2. Kommunalbestyrelsip qinnuteqaat § 6 imm. 1 malillugu suliarineqartussatut naatsorsuutiginnippagu tamanna qinnuteqaatip suliffissarsiuussisarfiimut tigusineraniit kingusinnerpaamik ullut marluk qaangiunneratigut qinnuteqartumut nalunaarutigineqassaaq. Qinnuteqaat nal. 12.00 sioqqullugu suliffissarsiuussisarfiimut qinnuteqartumit tunniunneqarsimappat aqaguani nal. 10.00 nallertinnagu akineqassaaq.

§ 8. § 5-imi imm. 4-mi, § 6-imi aamma § 7-imi imm. 2-mi akissuteqarnissamut killissarititat eqqortinneqanngippata qinnuteqartup qinnutigisimasani akuerineqarsimasutut naatsorsuutigisinnaavaa.

§ 9. Sulisussamik avataaneersumik atorfnitsitsinissamut imaluunniit sulisoqarnissamut akuersissut piffissamik qinnutigisamut qaangiisinaanngilaq.

Imm. 2. Atorfimmut ataavartumik atorfigitikkusutamut akuersissut piffissamut aalajangersimasumik sivilissusilimmut atuuttussanngortinneqarsinnaavoq, tak. inatsimmi § 6 imm. 1. Patsissaatitaasoq tassaavoq akuersissutip atuuffiani qularnaallisinneqarsinnaassasoq siunissami sulisussat pineqarsinnaasut allanngornissaat.

Imm. 3. Akuersissut piffissamut aalajangersimasumut sivilissusilimmik atuuttussanngortitaq qinnuteqaqqinnikkut sivitsorneqarsinnaavoq.

§ 10. Sulisitsisoq kommunalbestyrelsip inatsisip § 6-ia naapertorlugu aalajangigaanik Naalakkersuisunut naammagittaalliuteqarniaruni naammagittaalliutini allakkat puuannut "sulinissamut akuersissut"-mik nalunaaqutsikkamut ikillugu Naalakkersuisunut nassiutissavaa.

§ 11. Suliffissarsiuussisarfiup qinnuteqaatit aamma akuersissutit tunniussat kiisalu suliffissarsiortut suliffissarsisarnerat tunuartarnerannillu nalunaarutaasartut nalunaarsussavai. Aanunattaq suliffissarsiuussisarfiup suliffissanik ilisimaarinninnini kiisalu pisortat ingerlatsiviinik allanik suleqateqarnini tunngavigalugu alaatsinaassavaa inatsisip aalajangersagai malinneqarnersut.

§ 12. Suliffissarsiuussisarfiup sulisitsisut paasissutissanik makkuninnga paasiniaaffigisinnaavai:

1) suliap imaanik pisinnaasassanillu, matumani aamma sulliviup suleriaasiinik, piffissamik suliffusartumik, pissutsinik akissarsianut ineqartitsinermullu tunngassuteqartunik,

2) sulisoqassuseq sulisinnaasunillu pisariaqartitsineq, matumani aamma piginnaassutsit agguataarneqarnerat,

3) sulisorisat Kalaallit Nunaanneersut, matumani aamma sulisartut Kalaallit Nunaannut immikkut ittumik attuumassuteqartut, avataaneersullu agguataarsimanerat, aamma

4) suliffeqanngitsunut suliffissarsiortunut siusinnerusukkut suliffusimasinnaasuni suliap taamaatinneqarsimaneranut pissutaasoq.

§ 13. Suliffissarsiuussisarfiup sulisussanik avataaneersunik atorfnitsitsiumalluni qinnuteqaatit naatsorsuusiorlugit Isumaginninnermut Suliffeqarnermullu Pisortaqarfimmut nalunaarutigisassavai.

Aamma suliffissarsiuussisarfiup suliffissanik neqeroorutit nalunaarusiorsinnaavai.

Imm. 2. Suliffissarsiuussisarfiup suliffissarsiorlutik saaffiginnittut sulisinnaasullu sunik suliaqartarnerannik katitigaanerat kiisalu suliat suunerannik agguataarinerit sulliviillu angissusii naatsorsuusiorsinnaavai.

Naatsorsuusiassat assilinera Isumaginninnermut Suliffeqarnermullu Pisortaqarfimmut nassiunneqassaaq.

Imm. 3. Isumaginninnermut Suliffeqarnermullu Pisortaqarfimmut imm. 1-imi aamma imm. 2-mi nalunaarutigineqartussatut taaneqartut najoqqutassaar aalajangersaavigissavai.

Atortuulersitsineq

§ 14. Nalunaarut manna atortuulersinneqarpoq 1. september 1993 aallarnerfigalugu.

Imm. 2. Tamatumunnga peqatigitillugu kommunini suliffissarsiuussisarneq suliffissarsiortullu killilersimaarneqarnissaat il.il. pillugit Namminersornerullutik Oqartussat Nalunaarutaanni nr. 40-mi 18. september 1990-imeersumi §§ 8-18 atorunnaarsinneqarput.

Namminersornerullutik Oqartussat, ulloq 26. august 1993.

Henriette Rasmussen

/

Nukákuluk Kreutzmann

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut